


365.



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
Hielmst. 365 8° (LN 780 8° copy 2)








Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
Hielmst. 365 8° (LN 780 8° copy 2)



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
Hielmst. 365 8° (LN 780 8° copy 2)



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
Hielmst. 365 8° (LN 780 8° copy 2)



Nº 365.



*St. Underwood*



= LN 780

ex. 2



365

ASSERTIONES  
DE  
QVINTO PRÆ  
CEPTO,

*In disputationem propositæ, à Nicolao  
Hemmingio, in Decembri,  
anno Domini  
1570.*



*Hafniæ,*  
IMPRESSIT LAVREN-  
tius Benedicti.  
1570.





1.  
**VM** HOC SIT CONSILIUM  
legislatoris Dej, vt cum vnū  
præcipit contrarium vetet, &  
contrà cum vnum vetat, con-  
trarium præcipiat: fit vt singularum  
legum decalogi sint duæ hypotheses, vna  
affirmatiua, negatiua altera.

2.  
Sunt ergo huius quintæ legis duæ  
hypotheses: Negatiua, non occides, hoc  
est, tu homo non occides scilicet quem-  
uis hominem. Affirmatiua, vitam prox-  
imi fouebis, conseruabis, tueberis.

3.  
Ratio huius legis ex creatione homi-  
nis intelligitur, & clarè exprimitur  
Genes: 9. videlicet, quia homo est con-  
ditus ad imaginem & similitudinē Dej.

4.  
Finis autem huius legis est, vt mu-  
tuis officijs, & mutua beneuolentia so-  
cietas hominum inter sese coalescat, &  
con-





conseruetur, vt de Deo rectè doceri possint homines, vtq; viuant tranquille, quietè, honestè & piè in hac vita.

5.

Quicquid ergo ad hunc finem facit, hac quinta lege præcipitur, & quicquid vel huic fini aduersatur, vel quouis modo eum impedit, vetatur.

6.

Hinc manifestum est, non solum externum homicidium prohiberi hac lege: Verumetiam omnia quæ quouis modo gradus esse possunt ad homicidium, & quæ humanam societatem, quo minus suauis sit & tranquilla impedian.

7.

Hæc simul requiri etiam manifestum est, ex generali lege secundæ tabulæ, quæ est, diliges proximum tuum vt te ipsum.

8.

Sunt autem gradus ad externum homicidium plures, vt, cogitata, affectus,

A 2

dicta



dicta & facta pugnancia cum dilectione proximi. 9.

Ex cogitatione de proximo praua, affectus fieri nascuntur: ut impatentia, fastidium, malevolentia, contemptus, ἐπιχαιρέκακία, ira, odium, inuidia, indignatio, vindicta cupiditas, & multi alij. 10.

Hinc, hoc est ex affectibus, proueniunt dicta contra proximum, ut conuicia, probra, obtrectiones, quæ quouis gladio sunt acutiora, magisq; animum proximi vulnerant, quàm gladius corpus. 11.

Facta consequuntur dicta, ut iurgium, insultatio, prouocatio, pulsatio, & huiusmodi multa, quæ in generibus enumeratis continentur. 12.

Hos gradus sæpè excipit externum homicidium, quod est horrenda imaginis Dei destructio, ita enim Moses ait: Gen: 9. qui effuderit sanguinem hominis per



per hominem effundetur sanguis eius:  
quia ad imaginem Dei fecit hominem.

13.

Porro ab huius legis sententia multi  
aberrarunt, non attendentes legitimos  
huius legis limites & fines, quos impri-  
mis in omnibus legibus considerare o-  
portet.

14.

Primus error est Manichæorum,  
qui limites iustos transgressi, legem hanc  
de non occidendo, interpretabantur hoc  
modo: non occides, s. vlla viuentia. Sed  
horum errorem confutat, non solum rerum  
conditarum conditio: verumetiam The-  
sis sub qua continetur hæc hypothesis.

15.

Secundus error eorum est, qui puta-  
runt hinc prohiberi solummodò, ne quis  
aliu hominem occidat, non autem ve-  
tari, si quis se ipsum occiderit: vt Sam-  
son, Iudas, Empedocles, Cato, Lucretia,  
Seneca, Rasias.

16.

Tertio, hinc errant qui se à crimine

A 3

homi



homicidij alienos esse putant, si rogati  
volentem occiderint. Nam hic & qui pe-  
tit se occidi, & is qui occidit lege homi-  
cidij tenentur.

17.

Quarto, aberrant & illi ab huius le-  
gis mente, qui existimant sibi licere ho-  
stes Religionis, ut Mahometistas, &  
alios in Christum blasphemos priuato  
arbitrio occidere. Nam potestatem alie-  
nam sibi usurpant, quod Sacrilegij  
quoddam genus est.

18.

Quinto, aberrant quoque illi à scopo  
huius legis, qui hoc præceptum contra  
publicam iusticiam interpretantur, non  
discernentes inter hominis factum, &  
Dei iudicium, quod exercetur per homi-  
nem. Quare cum simpliciter lex ait : non  
occides, concludunt nullo pacto licere  
vllum hominem occidere, nec publica,  
nec priuata autoritate.

Ve



19.

*Verum cum ista sententia, pugnat  
& cum capite legis, & cum iusticia, &  
cum manifesto verbo Dei, eam fugia-  
mus vt falsam, & humanæ societatis  
pestem.*

20.

*Manifesta est lex de vindicta homi-  
cidij, Gen. 9. Item Exo: 23. maleficum  
non patieris viuere super terram.*

21.

*Vt enim è re corporis humani est,  
putridum membrum maturè abscindere,  
ne pars sincera trahatur: ita salutis so-  
cietatis humanæ interest, noxios & per-  
nitiosos ciues è medio tollere, ne malum  
vnius paulatim serpat in totum societa-  
tis corpus.*

22.

*Sextus error papistarum est, qui  
hoc præceptum manum cohibere dicunt,  
& non animum, quorum Vanitas mani-  
festior est, quam vt refutanda sit.*

A 4

Sep.



Septimo, aberrant quoque illi à mente  
huius legis, qui nullam vindictam licite  
& sine peccato expeti posse putant, etsi  
enim Magistratui permittunt ius gladij  
vt Dei ministro, ad iram ei qui quod  
malum est fecerit: tamen pios qui per  
fectionis laudem quærunt alienos esse ab  
omni expetitione vindictæ debere contē  
dunt. Atque ea de causa prohibitionem  
vindictæ inter consilia numerant, in illa  
falsa destinctione, qua dicunt Christum  
alia præcepisse, alia consuluisse, & hæc  
posteriora ad perfectionem pertinere, il  
la ad promiscuam Christianorū turbam.

In huius suæ sententiæ defensionem,  
dicta domini, Matt. 5. ne resistatis ma  
lo, item benefacite ijs qui oderunt vos:  
& illud Pauli, noli vinci à malo, sed  
vince bono malum: item illud, mihi vin  
dicta & ego retribuam, & huiusmodi  
multa alia adferunt.

Ve



25.

*Verum cum ex his dictis & simili-  
bus conantur omnem vindictam tollere,  
non distinguunt inter ea quæ simplici-  
ter, & ea quæ ex parte dicuntur, qualia  
sunt ea omnia, quæ ad tollendam omnem  
vindictam torquent.*

26.

*Natus est autem hic error, ex eo  
quod omnis hæreseos fons est, videlicet,  
cum de re aliqua agitur, eam æstimant  
imprudentes ex vno scripturæ loco, non  
rectè intellecto, & non circumferunt  
animum, ut par esset, per vniuersam  
scripturam, dicta omnia de re proposita  
conferentes, quam diligentiam Epipha-  
nius theoriā vocat: sine qua nemo scrip-  
turam rectè interpretari poterit.*

27.

*Est siquidem hæc Doctorum apud  
Hebræos sententia verissima: qui non  
aduertit quod supra & infra in libris  
scribitur, peruertit verba Dei viuentis.*

A 5

Nos



Nos ergo animum per totam scripturam circumferentes, depræhendimus quadruplicem vindictam, videlicet, diuinam, Heroicam, ordinatam, & temerariam: quarum sola postrema damnatur verbo Dei.

Diuina vindicta est, qua ipse Deus immediatè vlciscitur offensam, qua ipsius maiestas læsa est. Hanc vindictam & occultè & manifestè exercet, similiter in hac vita & postea, & est supra omnem legem.

Hæc semper iustissima est, vt quæ ab optimo Deo profiscatur: tametsi eius rationem non satis intelligimus, vlciscitur sæpè peccata parentum in liberis, Magistratus scelera in subditis, subditorum in capite, vnius flagitium in multis, idq; iustissimè, quia iustissimus.

Hic



31.

*Hic Dei vindicantis scrutari iudicia temerarium est, sunt enim iudicia Dei abyssus multa, adeo ut mensura sensus nostri & rationis capi non possint, adoremus ergo hic Dei iudicia, ac ipsum timeamus, ne in nos ira ipsius effundatur.*

32.

*Heroica vindicta est, quæ zelo divino accensa, ultionem sumit de hostibus Dei, huius heroicæ vindictæ exempla habemus in Samsone, qui eversione domus hostes Dei oppressit: in Elia sacerdotem Baalim, & duos quinquagenarios cum suis militibus occidente: in Heliseo conuicium non ferente puerorum: in Iudith sanctissima femina obtruncante Holofernem: in Christo eiciente ementes & videntes è templo flagello: in Petro, qui mentientem Annaniam verbo occidit.*

33.

*Hæc heroica vindicta præter legem fit*



fit communem, Quare huius rationem  
non in lege quæramus, sed Deo illam res  
linquamus, qui hunc zelum vindictæ in  
quibusdam excitat, in testimonium suæ  
iusticiæ.

34.

Ordinata vindicta & legitima est,  
quæ sub lege continetur & ex ordinatio-  
ne Dei, vel secundum rectam rationem,  
vel iuxta legem politicam, vel ad præ-  
scriptum verbi Dei exercetur ab eo, cui  
eius potestas à Deo est concessa. Hæc or-  
dinatam voco quia oritur à bona causa,  
& procedit per legitima media, ad bo-  
num aliquem finem.

35.

Hæc Pater contumaciam filij pu-  
nit: hæc pædagogus rebellionem discipu-  
li castigat: hæc minister Euangelij eum  
qui scandalo offendit, reprimat: hæc Ma-  
gistratus noxios ciues è medio tollit: hæc  
latrones, fures, aliosq; hostes Rector rei-  
publicæ cohercet.

36.

Sine hac vindicta nec domus, nec ci-



uitas, nec Ecclesia, nec regnum, nec vl-  
la humana societas incolumis esse potest.

37.

Porro ne hæc vindicta excedat iu-  
stos limites, duo considerentur: vnum de  
eo qui petit vindictam, quo sit animo,  
quem finem sibi proponat, quidq; eum ad  
vindictæ petitionem excitet. Alterum  
de ministro iusticiæ, cui vindicandi po-  
testas à Deo data est, quo sit affectu, ad  
quem scopum respiciat, & quid illi lice-  
at, & quid non.

38.

Qui petit vindictam sit alienus ab  
omni odio, in timore Dei confugiat ad  
remedium diuinitus ordinatum, nihil  
magis in votis habeat, quàm salutem eius  
qui offendit. Atq; ita à ministro iusticiæ  
petat defensionem, & correctionem eius  
qui læsit, ac intueatur iustos vindictæ fi-  
nes, videlicet, cohibitionē scelerum, pa-  
cem, et quietem societatis humanæ, æqui-  
tatis & iusticiæ conseruationem, amoti-

onem



onem scandali, destructionem regni Sathanae, regni Christi propagationem, & gloriam Dei. 39.

Hos fines qui dignè æstimat non solum iniuriam sibi illatā puniri petit: Verum etiam magno zelo fertur ad vindictam petendam de ijs qui vitæ turpitudine, morum leuitate, & scandalo faciunt vt doctrina Euangelij audiat malè apud aduersarios.

40.

Ideo dominus mandat, vt si quis peccauerit te conscio, vt illum primum admoneas ipse, deinde idem facias adhibito fratre aliquo, tandem si nihil effeceris vt dicas ecclesiae.

41.

Paulus obiurgat Corinthios conscios sceleris eius qui nouercam in vxorē duxit, quod ad tantum scelus tacuerint, & hominem qui tanti scandali autor fuit non coram Ecclesia accusauerint.

42.

Verum si sceleris commissi ratio ta-



lis fuerit, quòd accusatus in vitæ discrimen incurrat, sequenda est regula Bernardi, melius est vt pereat vnus, quam vnitas, nec pugnat cum dilectione proximi pœnam petere de flagitioso, est enim tota societas humana magis diligenda quam vnus incorrigibilis.

43.

Minister iusticiæ cui vindicandi potestas commissæ est, eosdem fines sibi proponat, quos dixi accusatorem debere aspicere. Deinde sit animo incorrupto. Tertio, sciat se non suam vindictam exercere, sed Dei, & non licere sibi vel parcere cuiq̃, vel aliquem absoluerè, nisi quem mens legis excipit. Scriptum est enim, qui condemnat iustum, & iustificat impium, vterq; abominatio est coram Deo: verum hîc magna prudentia in iudice requiritur.

44.

Temeraria vindicta sola damnatur verbo Dei (vt diximus) videlicet, cum  
vel



30  
uel is qui accusat cupiditate vindictæ ar-  
deat, et principaliter quærit pœnam eius  
qui offendit & interitum: vel cum is qui  
iudicat legem affectibus prauis contami-  
nat, & lætatur malo eius, de quo sumit  
vindictam: quod, quum fit, vterq; homi-  
cida coram Dei tribunali iudicatur.

45.

Est & temeraria vindicta, omnibus  
modis damnanda, quando læsus iniuriã  
sibi illatam per se vlcisci molitur. Nam  
quod Dei est proprium, ipse sceleratè sibi  
vendicat. Sed excipio defensionis <sup>ἐν αὐτο-</sup>  
<sup>φώσῳ</sup> necessitatem, ibi enim locum habet,  
vim vi repellere licet.

46.

Est & illa censenda temeraria vin-  
dicta, quæ cum exercetur à ministro iu-  
sticiæ, plus tamen mali adfert quam bo-  
ni. Nulla n: vindicta cuius finis malus  
est, à pijs est expetenda, aut exercenda.  
Beluarum enim potius est quam homi-  
num talis vindicta.



365.

ille ar  
ramus  
unt is qui  
omiam  
o sumit  
q homi  
itur.

omnibus  
iniuria  
r. Nam  
rate sibi  
is ex color  
habet,

ria om  
stro in  
am bo  
malus  
cenda.  
homi